

- d) broj i datum rješenja kojim je izrečena disciplinska sankcija,
  - e) izrečena disciplinska sankcija,
  - f) datum pravosnažnosti/konačnosti rješenja kojim je izrečena disciplinska sankcija,
  - g) datum izvršenja disciplinske sankcije,
  - h) postupak po pravnim lijekovima,
  - i) broj i datum rješenja o brisanju disciplinske sankcije i
  - j) napomena.
- (3) Evidencija iz stava (2) ovog člana vodi se u materijalnom obliku, u formatu A3, jednostranično, položeno, na Obrascu broj 1. koji je sastavni dio ovog pravilnika.
- (4) Evidencija o izrečenim disciplinskim sankcijama za teže povrede službene dužnosti sadrži sljedeće rubrike:
- a) redni broj,
  - b) ime i prezime policijskog službenika,
  - c) broj i datum zahtjeva za pokretanje disciplinskog postupka,
  - d) broj i datum rješenja o pokretanju disciplinskog postupka,
  - e) broj i datum rješenja kojim je okončan disciplinski postupak,
  - f) izrečena disciplinska sankcija,
  - g) datum pravosnažnosti/konačnosti rješenja kojim je izrečena disciplinska sankcija,
  - h) datum izvršenja disciplinske sankcije,
  - i) postupak po pravnim lijekovima,
  - j) broj i datum rješenja o brisanju disciplinske sankcije i
  - k) napomena.
- (5) Evidencija iz stava (4) ovog člana vodi se u materijalnom obliku, u formatu A3, jednostranično, položeno, na Obrascu broj 2. koji je sastavni dio ovog pravilnika.

## Član 64.

(Brisanje iz evidencije)

- (1) Ako policijski službenik u roku od jedne godine od dana pravosnažnosti rješenja kojim mu je izrečena disciplinska sankcija za lakšu povredu službene dužnosti ne učini novu povredu, izrečena sankcija se briše iz evidencije.
- (2) Ako policijski službenik u roku od pet godina od dana pravosnažnosti rješenja kojim mu je izrečena disciplinska sankcija za težu povredu službene dužnosti ne učini novu povredu, izrečena sankcija se briše iz evidencije.
- (3) Brisanje sankcija se vrši po službenoj dužnosti rješenjem policijskog komesara.
- (4) Brisane disciplinske sankcije ne mogu se spominjati niti koristiti u službenim zapisnicima ili postupcima.

**DIO DEVETI - PRIJELAZNE I ZAVRŠNE ODREDBE**

## Član 65.

(Opća odredba o dostavljanju)

Sva pismena i akti u postupku utvrđivanja disciplinske odgovornosti, a koja se dostavljaju policijskom službeniku, odnosno njegovom advokatu ukoliko ga ima, disciplinskom tužiocu, pozvanim svjedocima i vještacima i drugim licima, vrši se u skladu sa odgovarajućim odredbama Zakona o upravnom postupku ("Službene novine Federacije BiH", br. 2/98 i 48/99).

## Član 66.

(Postupci u toku)

Svi postupci započeti prije stupanja na snagu ovog pravilnika, okončat će se u skladu sa odredbama pravilnika po kojima su započeti.

## Član 67.

(Prestanak važenja)

Danom stupanja na snagu ovog pravilnika prestaje da važi Pravilnik o disciplinskoj odgovornosti policijskih službenika Ministarstva unutrašnjih poslova Kantona Sarajevo ("Službene novine Kantona Sarajevo", br. 35/06 i 43/15).

## Član 68.

(Stupanje na snagu)

Ovaj pravilnik stupa na snagu narednog dana od dana objavljivanja u "Službenim novinama Kantona Sarajevo."

Broj 01-7-04-5450/20

09. novembra 2020. godine

Ministar

Mr. **Ismir Jusko**, s. r.**OPĆINA CENTAR****Općinsko vijeće**

Na osnovu člana 25. stav (7) i člana 27. stav (1) Zakona o prostornom uređenju Kantona Sarajevo ("Službene novine Kantona Sarajevo", broj 24/17 i 1/18), te člana 7. i 10. Statuta Općine Centar ("Službene novine Kantona Sarajevo", broj 23/04 - Prečišćeni tekst), Općinsko vijeće Centar Sarajevo je, na 11. vanrednoj sjednici, održanoj online dana 29.10.2020. godine, donijelo

**ODLUKU****O USVAJANJU REGULACIONOG PLANA  
"STAMBENO NASELJE POLJINE"**

## Član 1.

Regulacioni plan "Stambeno naselje Poljine" (u daljem tekstu: Plan).

## Član 2.

Plan se sastoji od tekstualnog i grafičkog dijela.

Tekstualni dio sadrži:

- Odluka o provođenju RP "Stambeno naselje Poljine"
- Tekstualni dio Plana.

Grafički dio sadrži:

1. Faza-Urbanizam prezentiran na odgovarajućem broju tematskih karata i to:
  - karta 1. Izvod iz Prostornog plana Kantona Sarajevo
  - karta 2. Izvod iz Urbanističkog plana
  - karta 3. Ažurna geodetska podloga
  - karta 4. Postojeće stanje
  - karta 5. IG karta
  - karta 6. Planirano stanje-Razmještaj namjena i spratnost objekata
  - karta 7. Planirana namjena površina
  - karta 8. Mreža regulacionih i građevinskih linija
2. Faza saobraćaja sa prilozima
3. Analitička obrada građevinskih parcela

## Član 3.

Idejna rješenja faza saobraćaja, snabdijevanja vodom i odvodnje otpadnih i oborinskih voda, elektroenergetike i javne rasvjete i TK mreže su sastavni dio ovog Plana.

## Član 4.

Po jedan primjerak ovjerenog elaborata nalazi se na stalnom javnom uvidu i čuva se u Službi za urbanizam i zaštitu okoliša Općine Centar i Zavodu za planiranje razvoja Kantona Sarajevo.

## Član 5.

Ova odluka stupa na snagu osmog dana od dana objavljivanja u "Službenim novinama Kantona Sarajevo".

Broj 01-19-5782/20  
29. oktobra 2020. godine  
Sarajevo

Predsjedavajuća  
Općinskog vijeća  
**Karolina Karačić**, s. r.

Ova odluka je objavljena na oglasnoj ploči Općine Centar dana 06.11.2020. godine.

Na osnovu člana 25. stav (7) Zakona o prostornom uređenju Kantona Sarajevo ("Službene novine Kantona Sarajevo", broj 24/17 i 1/18), te člana 7. i 10. Statuta Općine Centar ("Službene novine Kantona Sarajevo", broj 23/04 - Prečišćeni tekst), Općinsko vijeće Centar Sarajevo je, na 11. vanrednoj sjednici, održanoj online dana 29.10.2020. godine, donijelo

**ODLUKU  
O PROVOĐENJU REGULACIONOG PLANA  
"STAMBENO NASELJE POLJINE"**

## Član 1.

Ovom Odlukom utvrđuju se uvjeti izgradnje, uređenja, zaštite prostora i način provođenja Regulacionog plana "Stambeno naselje Poljine" (u daljem tekstu Plan), a naročito granice obuhvata, urbanističko-tehnički uvjeti za izgradnju građevina, uvjeti uređenja građevinskog zemljišta, uvjeti uređenja zelenih površina, kao i površina pod saobraćajem i komunalnom infrastrukturom.

## Član 2.

Granica Plana obuhvata parcele k.č. 552/4, 558, 559, 561, 567, 568, 570, 571/2, i 572.

Sve gore navedene parcele se nalaze u K.O. Poljine, Općina Centar.

Površina obuhvata Plana iznosi: 2,72 ha.

## Član 3

Obuhvat ovog Plana, smješten je u urbanom području Općine Centar prema Izmjenama i dopunama Prostornog plana Kantona Sarajevo za period 2003. do 2023. godine ("Službene novine Kantona Sarajevo", br. 26/06, 4/11 i 22/17), a u granicama građevinskog zemljišta u skladu sa članom 2. Odluke o građevinskom zemljištu za teritoriju Općine Centar ("Službene novine Kantona Sarajevo", br. 3/14).

## Član 4.

Izgradnja na području planiranja u granicama opisanim u članu 2. se vrši na osnovu Plana.

## Član 5.

Urbanističko tehnički uslovi za izgradnju građevina:

## 5.1. Regulaciona linija i parcelacija:

- Građevinske parcele utvrđene su regulacionom linijom i definisane su u grafičkom dijelu Plana;

Planom utvrđene parcele moguće je zavisno od potrebe potencijalnih investitora spajati više parcela u jednu, pri čemu se ne može remetiti planirani saobraćajni koncept i utvrđena distanca građevinskih linija u odnosu na saobraćajnice i susjedne objekte.

## 5.2. Građevinska linija:

- Građevinska linija utvrđuje dio građevinske parcele na kojoj je moguće izgraditi građevinu. Građevinskom linijom je utvrđena udaljenost objekta od regulacione linije i pravac pružanja ulične fasade. Građevinska linija ne može prelaziti regulacionu liniju. Unutar građevinskih linija investitor je slobodan da definiše tlocrt građevina s

tim da ni jednim dijelom građevina ne može preći građevinsku liniju.

## 5.3. Spratna visina i etaže objekta:

Planirana spratnost i odstojanje građevinskih linija utvrđene su Planom i ne mogu se mijenjati;

- Spratnost objekata na kosom terenu odnosi se na dio vertikalnog gabarita objekta lociranog na nižoj strani uređenog terena, odnosno računa se od kote najnižeg ruba uređenog terena uz građevinu;
- Suteran je etaža dijelimično ukopana u teren sa tri strane i slobodnim pročeljem, kao i etaža zgrade koja je ukopana u odnosu na uređen teren između jedne četvrtine do jedne polovine svog volumena (između 25% i 50%).

## 5.4. Arhitektonsko oblikovanje:

Kod arhitektonskog oblikovanja objekata koristiti slobodnije funkcionalno oblikovanje, ali sa jednostavnim-mimim arhitektonskim linijama.

## 5.5. Završna etaža i krovnište

Krovovi objekata mogu biti viševodni, preporučuje se primjena jednostavnih krovnih formi.

U slučaju primjene kosih krovova i tavanski prostori se mogu koristiti za sadržaje koji su u funkciji primarne namjene objekta, odnosno, za proširenje postojećih ili uspostavu novih stambenih jedinica. Za krovni pokrivač koristiti sve vrste crijepa.

## 5.6. Ostali uslovi:

- Koeficijent izgrađenosti utvrđen je i prezentiran u tekstualnom obrazloženju Plana;
- Nivelacione kote prizemlja planiranih objekata u odnosu na saobraćajnicu - ulicu utvrdit će se na osnovu nivelacionih kota saobraćajnica datih u Planu.
- Priključke na saobraćajnice i mrežu komunalne infrastrukture treba u svakom konkretnom slučaju projektovati u skladu sa Planom (važićim tehničkim normativima) na osnovu faza komunalne infrastrukture koje su sastavni dio Plana;

## Član 6.

Uvažavajući inženjerskogeološke i geotehničke karakteristike, date su sljedeće preporuke kojih se treba pridržavati kod projektovanja i gradnje:

- Temeljenje objekata može se izvršiti u slojevima 2a, 2b, 3 i 4. Ovisno o opterećenju i karakteru objekata i uslova globalne stabilnosti, kada god je to moguće temeljiti objekte u sloju 4 ili eventualno u sloju 3,
- Potporne konstrukcije temeljiti u sloju 4,
- Za individualne stambene objekte temeljenje se može vršiti na temeljnim trakama,
- Prilikom projektovanja temelja potrebno je uzeti u obzir ovdje navedene preporuke i, geomehaničke i seizmičke parametre, te dopuštene napone,
- Kod proračuna dopuštenih napona po kriteriju sloma uzeta je u obzir samo nosivost baze, te je zanemareno trenje bočnih strana kao i pasivni otpor.
- Predlaže se projektovanje i etažno uređenje padine. Nagibe treba dokazati u projektu i modelirati teren prema usvojenim parametrima u ovom elaboratu.
- Rješenja trasa saobraćajnica treba da budu sa što manje visokih nasipa i zasjeka.
- Sve iskope po mogućnosti raditi u sušnom periodu, a iskopani materijal se nikako ne smije deponovati na padini, već ga je potrebno odvesti na za to predviđenu lokaciju.

- Projektna rješenja treba da budu takva, da stabilizacioni radovi na saobraćajnicama i objektima budu ujedno i glavni stabilizacioni elementi za cijelo područje.

## Član 7.

Uređenje građevinskog zemljišta se mora izvesti u obimu i na način kako je to predviđeno Planom.

Izgradnja građevina se ne može započeti bez prethodnog minimalnog uređenja građevinskog zemljišta pod čime se podrazumijeva obezbjeđenje saobraćajnog pristupa parceli, priključenje na vodovodnu, kanalizacionu i elektroenergetsku mrežu, eventualno izmještanje vodova komunalne infrastrukture, te potrebnih radova na stabilizaciji terena.

Privremeno korištenje građevinskog zemljišta koje nije privedeno krajnjoj namjeni se ne može odobriti.

## Član 8.

Izgradnja objekata privremenog karaktera može se odobriti isključivo za potrebe gradilišta, a u skladu sa članom 77. Zakona o prostornom uređenju Kantona Sarajevo ("Službene novine Kantona Sarajevo", broj 07/05).

## Član 9.

Saobraćajne površine su utvrđene planom-faza saobraćaja. Parkiranje - garažiranje za novoplanirane objekte, se mora obezbijediti u sklopu pripadajuće parcele.

Prilikom izdavanja urbanističke saglasnosti za novoplanirane objekte, a na osnovu tražene bruto građevinske površine i namjene, neophodno je odrediti broj parking - garažnih mjesta i to na sljedeći način:

- za stambenu izgradnju 1 stan - 1 parking mjesto,

## Član 10.

Izgradnja i uređenje zelenih površina te komunalne infrastrukture vrši se u skladu sa prethodno pribavljenom odgovarajućom dokumentacijom urađenih na osnovu Idejnih rješenja, koji je sastavni dio Plana.

## Član 11.

Uslovi za sklanjanje stanovništva i materijalnih dobara moraju biti obezbjeđeni u skladu sa odredbama Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", broj 39/03) i

odredbama Uredbe o mjerilima, kriterijima i načinu izgradnje skloništa i tehničkim normativima za kontrolu ispravnosti skloništa ("Službene novine Federacije BiH", broj 21/05).

## Član 12.

Pri izdavanju dozvole za građenje arhitektonskih objekata potrebno je pribaviti inženjerskogeološki i geotehnički nalaz i uslove temeljenja od stručnih institucija, a statički proračun mora se dimenzionirati za potrebe najmanje 8° MCS.

Tehnička dokumentacija za realizaciju novih objekata mora biti u saglasnosti sa preporukama vezanim za konstruktivne elemente same građevine i neophodnih radova na okolnom terenu na osnovu detaljnog inženjerskogeološkog i geotehničkog izvještaja, koji treba biti urađen od strane ovlaštene firme.

Obim i kvalitet izvedenih radova vezanih za geoinženjerske uslove moraju biti verifikovani u okviru tehničkog prijema, a upotrebna dozvola se ne može izdati ukoliko predviđeni radovi nisu u obimu i kvalitetu zadovoljavajući;

## Član 13.

U postupku donošenja odobrenja za građenje, odnosno u postupku donošenja urbanističke saglasnosti i odobrenja za građenje nivelete pješačkih saobraćajnica, kao i prilazi i ulazi u građevine moraju biti isprojektovane i izvedene prema Uredbi o urbanističko-tehničkim uvjetima, prostornim standardima i normativima za otklanjanje i sprječavanje stvaranja arhitektonsko-urbanističkih barijera za kretanje invalidnih lica koja koriste tehnička i ortopedska pomagala ("Službene novine Kantona Sarajevo", broj 5/00).

## Član 14.

Ova Odluka stupa na snagu osmog dana od dana objavljivanja u "Službenim novinama Kantona Sarajevo".

Broj 01-19-5783/20  
29. oktobra 2020. godine  
Sarajevo

Predsjedavajuća  
Općinskog vijeća  
**Karolina Karačić, s. r.**

Ova odluka je objavljena na oglasnoj ploči Općine Centar 06.11.2020. godine.









